

四庫全書

集部

欽定四庫全書

集部

秋崖集卷二十七

詳校官起居注主事<sub>臣</sub>顧宗泰

主事<sub>臣</sub>呂雲棟覆勘

總校官進士<sub>臣</sub>朱

鈐

校對官中書<sub>臣</sub>高

中

謄錄監生<sub>臣</sub>施

華

欽定四庫全書

秋崖集卷二十七

宋 方岳 撰

簡劄

答吳總侍

某伏讀誨事有曰相疎未有如此時為之寒栗起栗益  
某之為人率不能如世俗之事上無時而書焉以為恭  
無謂而謂焉以為密此其情狀當與巧言令色者同科

某既不敢以此事先生而又前月二十四日里人不戒於火延及所居禮有火焚其前人之弊廬三日哭蓋至今懷居之淚未乾思親之心欲馳也近遣迎老人許以正月為此亢方將丐一舟於先生而台翰至如之何其不愧李兄者某嘗接納之杯酒之慇懃亦歎忽移晷徐編修累數百言極其所以詆媒者大畧謂梱公與之篋庫非某意也而怒之而据之所賴素行頗修梱公不以為怒不然殆笑人固難知如此哉某始欲寘之於理又

念或者其必謂某不能容一士召而質責之而已今獨有數項官錢未了雖非某所得專然敢不仰體先生之盛心也義夫以二十日至安豐遂與夏侯淝水以拒敵兵攻城之銳春且近矣此城當可保也梱公節制淮西諸郡叔獻以為朝廷處置得宜某獨爭以為不可無故而隳一梱在朝廷既已非矣此等負荷有過無功成是敗非古今一律今日毀子華之怯者即前日譽子華之勇者也先生以為如何某今無家可歸而數月間當

滿欲就先生謀所以居者十數日間拜狀懇舟又十數日當迎老人於境上敢上謁以請其私惟先生進之

答恭率翁

闊焉不聞問蓋自壬癸甲乙四閱歲矣人生堪幾回別也某之斥政坐淮湘一書毛錐子乃能為崇如此抱瓮灌園未嘗以一字入帝城或出言面之幾微挑我者屢北山猿鶴戒以毋出潛深伏隲謂休此生不圖風飛雷厲之初亦記月釣雲耕之輩也某之於故府真是三入

承明貿貿此來亦可謂頑鈍無恥猶謂前年春日有僧  
饒嘉疏戲答以伽陀云莫怪青衫霜葉枯六年不改舊  
稱呼人間書疏非吾事如此春盤何處無豈知所謂稱  
呼者今八年矣猶不改也唯弓旌所招巖穴為盡亦欲  
一觀盛化耳率翁方與五百開士追逐雲月於苒梁雪  
瀑之外世間凡夫乃以此等塵俗浣山中草木得無有  
語耶某去婦復還堂前禮數故在欲言何限少俟嗣音

答謝兄

某與執事如水上市萍風約之偶相值耳軒然洗雙玉澆  
我牢愁此意何可忘也著書滿屋直欲卧餘子百尺樓  
下微見抄忽已如身入武庫但覺洞心駭目莫識名件  
侯喜劉師服輩伏矣四冊謹上書府他遲佳晤

答黃宰

某廼歲臘盡時造物小兒者怒此腹無書盤攪不可忍  
得玉灑讀不能句況堪作報函耶瞻言鳬飛於以負負  
某三年牛下謂休此生矣聖上離照於久儲神之後乾



旋於一反手之間弓旌所招羣蟄咸奮不才如某猶得  
以卽鄆故步沐浴帝澤亦可以見一介不遺之盛鮎魚  
上竹姑付吾天執事者愛棠陰老氓種種過厚歲除之  
饗既賜矣孟光守舍頗聞閨淑撫存兩頑何等牧牛童  
亦許延致某敢勿書紳曩委敬刻之心撫幾即發不識  
如某輩一羽輕者亦可為鄭師先乎臨紙悃結

答饒監丞

某伏以春已中分霽望韶秀恭惟恬民氣於山水之外

簡帝心於巖陞之間有翼有嚴式遄綸召某退然一老  
氓耳辱知於趨進翼如之先佩眷於擯廢不齒之日輟  
耕壟上猶當洗荷鋤之手頻首戲下豈有近如行在所  
將出棠陰乃從間道買扁舟若相避者山雪作祟寒疾  
不可以風瞻言燕凝有慨其嘆惟是前此里居月叨大  
府繼廩之賜今茲幸縻寸祿敢以上還一狀下有司感  
激請畫惟台慈垂亮入覲定不晚某當迎拜都門外相  
與道平生以明注仰臨紙帽結無任此情

答甯知錄

某一別且十年世事凡幾更矣憂患所嚙風波所饕雲  
卧林丘柳欲生肘平生交舊今亦莫知何如有來翰題  
喚起昨夢乃知孤雲戍角之外尚留珮音謂書生為不  
武誤矣荒城夜半一卒詔謹談笑定之功亦不細當有  
為上言者如某六六政坐文窮淮梱一書乃能為崇如  
此卦不為夬終當在南山之南北山之北耳羣賢萃聚  
亦與旁招自喜行藏差亦無愧此外皆不計也何時佳

晤傾倒所懷

答金守

某田家子也所與交者非輟耕之夫則荷滌之叟也相  
餉以子桑之飯而相羹以伯夷之薇則有之矣執事者  
之饋意其若是而已耳置書卷間未見蔑之面也他日  
發篋則筆如此其精也墨如此其妙也喟然歎曰寃哉  
之二物者所謂以暗投人渠不識也某敢不重拜

答奚兄

某記與景元涉相潭訪靖廬時蓋亦桂花後菊花前也  
今一年矣景元鸚鵡賦之墨未乾淮海樓之興不淺江  
山迷人固應爾如秋崖老子則又可笑洗黃獨之手而  
把筆漱白醖之口而說經山中草木其謂予為何如人  
也四六妙甚惟某區區者如君侯何哉世路如秋風相  
逢盡蕭索非得所謂捩鼻木者不辦事嘆其早矣淫霖  
繼之歲事其可憂吾儕何往而不窮也為君計寧南山  
歸舊廬之愈乎勿罪勿罪

答曹帥幾

間者上謁不知拔宅已西鷄犬皆仙矣翩翩佳公子入  
大莫府想主人敬愛驚問江山曾見有此客否也老先  
生鳳鳴朝陽梧桐其菟矣樞相得書喜且曰詰朝其有  
以報日日側耳而猶未則不知其解也尚其趣之索書  
者再三不得不姑以復命調肅之於禱而鞭笞之於請  
敬略

答鄉友

某維菊之黃矣碧宙沉寥共惟漱詩書之晚香燕琴尊  
之暇逸有嚴有翼台候多福某夜半雪興徑上剡溪之  
舟慙見山移不能告行於常所往來者忽忽秋葉又丹  
矣人間歲月可驚固如此某冉冉欲老方以十五年前  
舊青衫從國子先生入太學場屋之夢恍如也典刑如  
執事頌而不規則他復何望時事有可慨者未知與長  
鑱黃獨定何如率然挈家真是聚六州鐵鑄此一大錯  
也何時磨晤傾倒所懷

答朱兄

某與足下無一日雅率然過從固未了足下之爲人也  
謂爲豪傑耶雖無文王猶興何屑屑世人如此謂爲高  
隱耶一不遭時則南山之南北山之北矣某是以未之  
曉若丘制使書某固以爲八年不通問容少盡人間賀  
謝之禮然後敢白事得訊遂蒙雅責何仰某一生毀譽  
付之世情得失付之造物却未易以此撼然已遣人問  
稱呼矣至則以前



答汪兄

某伏以秋氣澄穆曉江欲寒恭惟清入吟邊雅有神助  
某未能免俗苦縛微官昔為馬口銜今為禁門鍵實同  
此歎荆溪勝處誠齋有集在焉着君其間毋使鄧禹笑  
人寂寂如噲伍等置之勿復道可也敬略推幕示諭某  
敢無盡情獨恨不識王史君耳孰與史君厚某可與宛  
轉者乎請更之佳晤未涯惟飽佳山水以昌其詩

答張兄

某宿辱高軒過今猶隱隱有金石聲也小試健筆真是刊落陳言一洗凡馬而空之者以此衆戰垓下軍辟易三舍得臣其寓目焉

答陳教

老骨怯寒方踞磚爐燃竹火而雪霰交下淒風冰人詩肩如山毛髮為立顧視四壁窸窣有聲披戶視之乃吾所齋兩腕脰也驚喜過望少湏盥薇露焚玉蕤長哦以謝

答李錄

某遡風有懷又在孤城吹角水茫茫之外一書不能西也秋杪奉教尺無何而計院丐麾去自爾莫知寄鴈處矣惟有注仰吾榜得人如執事乃猶未能齊飛五鳳與金閨諸彥相頡頏名之不彰友之過也風頹俗靡所謂捩鼻木者非蝨官所能辦奈何曩言之徐中書而中書殂又言之楊監丞而監丞去今執事所謂棘卿者又復不來矣豈執事之遇合固不此是耶勉旃前修未有珩

璜至寶擲棄官道傍者也某亦退而書紳但當逢人說項斯而已

答韓寺丞

某脫夫湏起民伍不得與里之父兄子弟膏沐仁政於耕雨鋤煙之外獨聞之東西行者以為民春風而吏秋霜也只此一語三十六峯翔舞矣某雖去田里與受其賜敢不敬拜某退然氓耳刺史朱兩轡而臨其鄉百函而通爵里者武相接也某也獨未以書賀此宜所在督

過而灑翰先之賡之以鏗金戛玉之詩寫之以屈鐵蟠  
銀之字矮屋迫窄光芒欲飛某時出諸公誇示之平生  
未見此奇也敢不載拜

答范丞相

某惟先生從韋布登元宰為吾君聚衆君子而去之若  
未嘗與焉者可謂無遺憾矣悠悠之說從古固然政自  
無用置牙頰間也鳴騶待漏十五年不出都門乍見鷺  
侶鷗朋與煙雲相滅沒何樂如之心脾小疼計當勿藥

有喜某辱知蚤追送宜不在他人後適會當對日日遷  
延乃聞六符之光已過釣石所不瞻悵有如此江釣諭  
謝表敬竢頒曉臨紙淒斷不勝下情

又

某伏聞袞繡之歸問館於驛邸衣冠盛事纔見此第二  
無地起樓臺丞相也甚盛甚休三復釣畫如御風騎氣  
超然事物之表而精神與山川相映發畧無老態以此  
見詩書之蘊要自非悠悠者所知曩時體中小不佳筆

墨間畧已覘無恙矣至以為尉佳時暇日亦復巾柴車  
支竹杖從山僧野老訪黃初平於晴嵐暝翠之外乎張  
留侯崎嶇楚漢兵爭之交一旦遂從赤松子棄人間事  
蕭曹諸人豈但辟易三舍甚恨一門生兩兒子之不相  
並也某賴如天之福後月當脫選告下便丐一贄倅歸  
矣表謹擬上未知能道鈞意否

答吳尚書

某自平童子來得所惠翰乃知詩書之澤流潤演迤外

家童烏亦得其記問之一二園橋觀聽啻啻嘉嘆不知  
江之發岷山也某賴如天之福四月當脫選隨手丐一  
贅倅去數日以待先生之出特未知堪為用否雨露之  
所濡甘苦齊結實造化固無棄物掣斂僻左處以須春  
陽此某丐倅意也士方未脫場屋望一第如登天今顧  
不滿於倅耶敢私布之

答趙都統

某摻別吳波亭於今八見榆火新矣風餐雪虐屏處田



廬亦莫知細柳之營竟何許也廼春來此始聞在第一  
山邊地鴈寒惟有簷竚太尉山西宿將曾以半段鎗為  
國家築京觀於雷塘功亦不細矣敵負戎馬足敢窺近  
邊老熊當道而扼其吭不在盱泗間乎太尉勉旃某起  
從牛衣中髮種種如雪會當去此豈能與諸賢相俎豆  
耶樞參老先生亦不得時時樞趨竊料結髮從軍無如  
太尉久賢主人柄用必將白上趣召之嚴扈周廬非太  
尉誰也某當杖策軍門以謁

答陳料院

某伏以春規欲盡花雨逗寒共惟簡在玉珽召綸近咫  
有嚴有翼某一別十五稔杳不知并合之期何圖脫襜  
襖起田間適會奏計行在所相見驩甚乃知樂莫樂於  
新相知未為能道人意中事也繫船柳下乞一外料徑  
歸詩情浩然不計上事遠近興寄亦高也異時課縣最  
眠院轄若將浼焉政恐未容年歲讀書坐需此次某風  
餐雪虐事事闌珊後月如遂脫選便當丐一外差遣去

不規而頌甚非所望於執事也廼者得對自以四方草  
茅乍登文石不敢極言天下事賴上明聖顧問再三所  
以誤承天獎者甚至亦有傳至書府者耶不勝慙謝某  
本不解作字來諭又徑三數尺倉卒何緣有此如椽筆  
也撮巾濡粉就黑几上書之漫為臨去定知不入山靈  
意得勒回為佳耳

答趙倅

某伏以麥之秋矣暑雨寢霑共惟與郡平章民以嘉靖

有皇委貺某退然坻耳間者見大夫肯辱臨之坻知罪  
矣亟驅車走江臯則聞負弩矢者已東而登臺低龜又  
不能奉一書為里父老賀蓋於是犯三不韙此宜在何  
譴顧獨睠然灑翰先之耶某敢拜大夫之重勤有如演  
迤銀潢粹然如古圭瓚繅藉清廟惟帝其嘉之半刺翺  
翔政恐紫陽山水未足久稽天下士也某環堵在宇下  
惟公焉依方一再問大鈞丐一閑外得請則歸倚鋤有  
日矣未問惟厚自金玉佳御燕羹式遄召綸入覲王所

答葉秘書

某伏以暑氣如愔稻苗方旱共惟於皇入覲棟幹斯文  
奎壁揚光有相之道某往年荷鉏甫里漁樵爭席獨執  
事以行秘書臨其處為我二天眷然拊之此意自在同  
年生之外也召還不賀憂歸不吊某則罪矣乃若其情  
則有可諉者誅之在執事不誅獨無愧於心乎翩翩有  
書餘二千里而至仁賢襟度固自超出流俗曼曼而某  
為何如人也比讀除目竊諗見思宣室重上道山東壁

圖書非一世魁彥莫可典領帝固為吾道計也然國人之言曰道所以用世經綸密勿而舉吾君於三代之隆將又有大者修門稅駕適有殊褒某維日望之某慙且踈秘書所知也三入故府大似頑鈍無恥乃今從國子先生後忽忽餘年退而省其私屢丐一員外倅未與也不知得迎拜馬首一道其別後之懷而去否上思見甚其疾爾驅

答金興國

某維秋雲逗雨撼有寒聲恭惟趣舍人之裝行刺史之  
部仁聲先路江介清夷某不面者幾時不書者亦幾時  
塵埃迷人江山愁予莫知梧風之又秋也一鴈寥沉惠  
然好音老成典刑有屈輩行至北於戲下為盛德如某  
其不敏何喬木參天青銅之幹故在綰二千石印綬而  
去雖暫遠上傍而郡國龔黃此寄甚不輕也伏讀來教  
所謂愛惜民力培植邦本此兩言者仁天下有餘先一  
州豈君相意哉式過其歸儀我萬玉某自知甚審丐一

贅倖者無慮七八上廟堂難之乃聞鄉邑又不戒於火此心如飛牛衣未寒行返吾故所敢請者惟金玉體府以穆召綸

答潘南夫

得所惠教其意若有不能釋然者諸妄校尉已下材能不及中往往以軍功取封侯飛將軍顧獨不得與為此雖霸陵醉翁亦將不能釋然於此也雖然世所謂仕宦者優戲耳適輿臺之驟衣冠之政自不滿飽老郭郎一



笑本來面目初無爾許事也願執事寘之碧玉之山青  
羅之江着我其間要是不惡同班序引自是君家縣令  
歲所不如此言將無面見北山猿鶴矣我日斯邁而月  
斯征各相勉旃毋負疇昔

答魏監丞

某別奉璩題教之以貢院記不鄙謂某使之書丹夫以  
邦君侯之媿化鄉達尊之偉辭何物小子掛名其間顧  
非幸歟抑某有所不敢者此所謂金石刻也書有六體

與八卦九章相為文點畫偏傍皆天地自然之數小有  
謬誤則字非其字矣士失其學六藝湮微頡頏以來傳  
者能幾而某也老於場屋平時藁草日千數百言何暇  
成字也以此上石得無不可乎又且屏廢山材頭銜可  
鄙非若浮梁記之使其僚使其民為可以影帶過也元  
本并紙謹以上之司書方命有誅惟有屏息

答高吏部

某往年綴末班嘗一再望見嚴毅之色聞從旁喈者曰

是不為上殿虎且為獨擊鵲矣已而有傳諫草者紙價  
為貴伏讀歎息所謂快哉此風也里中有樵夫負薪朝  
出賣視其薪挺挺然無一莖曲者或問之故樵者曰曲  
也者內也直也者外也某聞之曰嘻有是哉蓋此言之  
宿於胷中者幾年矣今一為明執事道之若某則又有  
可笑者既不能泛泛然其鳬之趨又不能矯矯然其鶴  
之孤已乎已乎往者不可悔來者猶可追紙尾戒垂敬  
聞命矣

答南康同官

某窮山之鄙細也鉏耒之與居蕘牧之與曹而已耳起家為郡茫然未知所以聞諸道路衛多君子某其知免矣方俟掌訝者至奉咫尺書求所以教者顧乃重裊疊璽駢四儷六而貺之頌而不規某則大失望夫記室之問古所不廢然皆道情懷致忠愛以胥教誨者耳非若今抽黃對白釀飾浮詞恭至於足敬至於繆也盍自吾曹更之某不敢承盛心而上之於受書謁者康廬為郡

雖小國寡民而前有濂溪後有晦庵大懼貂續者之難也條教當何以設施當何先民瘼當何瘳吏奸當何戢願一二熟數之其母金玉爾音某湏以從事

答吳倅

某維黍之秀有霖其甘共惟去尺五天之邊刺二千石之半侯隹侯翼台侯休嘉某方脫襁褓而腰吾紳解笈簪而手吾筆雖曰教壁水校石渠政亦野哉其麋鹿耳傾蓋而投分倒屣而話詩何執事者之不麋鹿我也裴

晉公督九節度擇以自從於是望美人兮一方隔明月  
其千里亡何而又駕轂輶於村南北矣與五老而六不  
自意其真在廬山也異時天府倅徑戴獬豸冠為御史  
式遄玉札嗣貢賀床

答饒監丞

某惟士之出處異則其所以與世接者夫固自有體出  
而朝市則掃魏渤之門不為佞漫禰衡之刺不為辱達  
殷浩之函不為黷也入而山林則耕延陵之臯者潛魚

荷石門之篠者冥鴻抱漢陰之甕者驚磨其能諧際人  
事而與世間之書疏乎某祈之鄙細人而屏廢北山下  
者再寒暑矣無學也而知命無材也而安分蓋其姓名  
不入帝城者亦再寒暑春蓑煙雨黃犢對眠亦莫知今  
吾之與故吾定何如也然而所與交者莢子而其性疎  
所與談者檣事而其言野見當世之薦紳大夫則鷗心  
之駭麟鳳也伏惟閣下以詩書之澤父母吾邦邦之士  
者裹章服而趨農者釋鋤耒而迎而某也偃蹇蓬藿之

逕而莫之見也蕪絕筆墨之交而莫之書也夫固以跪  
邀賢達之車祈侯形勢之塗屏廢者之體不爾也意者  
既聲銷影滅於戲下矣不圖猶闕聽聞而續之食也某  
之有秩於大府實昉於史侯而某於侯本無一日之雅  
其初亦莫之敢見而莫之敢書也侯不知其愚予之書  
焉至於一再而不已而某始敢書召之見焉至於十數  
而不已而某始敢見蓋屏廢者之體固如此也史侯歸  
則止矣而閣下續之豈所謂更加賞賜以媿其心者耶



某將辭於有司則前日之受非也故敢道其所以而惟  
戲下貫之草廬夜午有歌戲下與邑大夫之詩而過者  
仁人之言藹如也如使郡龔黃而縣卓魯則桑麻雨露  
之外如某等伍者飯不足而樂有餘矣載賡乃歌戲下  
其寓目焉

答劉教授

某有病與嵇康同所謂素不便書又不喜作書也幸而  
文度來可以免報書者一又幸而執事者且至可以免

報書者二是以略示諭云云謹以書往古人之事不敢以望今世之人孰謂山林草茅方得罪於時而其言可以動天子侍從之臣之聽哉雖然死諸葛走生仲達亦未可知也

答葉兄

某為爾寂寂得所示高文九鉅編何其多也老嬾未能盡閱然亦嘗鼎嚮矣詩自明良賡載降而為五子之歌又降而為三百篇之什又降為離騷之經至漢唐而為

五言為七言為歌行引歎辭謠之類蓋千數百家而未  
已也杜竒而法李豪而逸白質而醇韓壯而深柳淡而  
雅雖各自名家而一出於正有所歸宿蓋不法而竒則  
怪不逸而豪則蕩不醇而質則俚不深而壯則穉不雅  
而淡則俗故詩雖小技而亦未易言也某雅不能詩然  
讀君所謂羊口行諸篇則誠不解為何等語也古人遠  
矣君試取時今諸公之文參讀之如讀蘭辭則參以高  
續古之秋蘭如讀責蚤則參以洪舜俞之烘蚤蓋有不

待言語而了然曾次間者矣至若探馬籌等作是何市井鄙事而可為文也感君所以惠教之意輒效愚忠如欲求譽而已者當世之能譽者固不少奚為於某適因灼艾創甚欲言不能既惟足下亮之

答湯侍郎

某儲文未至固嘗挹浮丘之袂拍洪崖之肩矣侍宸碧落今隔幾塵不自意玉書行行翩其飛下南斗旁也上思輯方夏譽髦斯征有翹弓旌日夜望珥貂之入至切

牽雲留月遲遲吾行道則高矣顧今天下如駕百漏之  
舟於風濤浩渺之中徐而言曰如此將安之耶非所望  
於明公也若某等輩則所謂增之不為高去之不為低  
者也挾其骭髀而不山林固亦徒取世憎耳欲言何限  
瞻望慨然青玉峽老敬聞命矣

答程教

某畦菜塢中忽得所惠翰竊諗斯文多幸駕言采芹綠  
竹遺音隱隱孔壁不獨為當塗矜佩賀也時文破碎六

籍久昏振木鐸而新媾之非廣文先生之望而誰望某  
老不能從事兩不借送君筆峯聞月盡方成行或可寄  
一詩筒為別耳

答李兄

某歸自廬山方苦草築一室號歸來館作勞休於樹蒼  
頭奴持一緘書來晚眎題識則兄也此非門外人亟取  
亟讀恨不洗老瓦館中相與作淵明後辭耳正月且盡  
兄何不遂鼓行而西以逸待勞奠而後發敵人當應弦

倒矣宸章與硯與礪清哉兄之饒也山中草木得無脩  
容某之此歸本非戮揚干僕也撻一舟子何至是邵武  
之命丐祠丐罷皆不許奈何蒼頭至樹下時方營度一  
詩并申省狀寫去可以知本末矣是事姑寘但湏一兩  
月後作賀書君行勉旃某自今數日以竢

答馮此山

某在鄭公鄉時每登金芙蓉觀望此山草木董董一墻  
隔未嘗不喟然歎曰嗟乎使蘇長公而在未必不又以

為寧不識面目之真不可不使身在此山也某住山八  
閱月竟不識此山而歸獨不可謂大欠乎雖然某之不  
此山之識某之不足以識此山也煙雲吐吞衣屨猶濕  
前之日則身乎此山矣山窗夜寒時入幽夢今之日不  
心乎此山與某之不識此山安知其非深識也特未知  
此山老仙亦識某之骭體矣乎亦識某之草茅矣乎羣  
輩叫號挺刃隳突使吾民邸店晝閉如避劇盜甚至迫  
人於險漂淪風濤昌黎為其長安得不追而杖之然則



固骭髀而非草茅也即日解印綬去贏錢十四萬緡米  
萬餘石少遲歲月自詭不乞朝廷一錢環城而築之此  
意不遂乃藉以付後之人初亦覺老先生拳拳此城敢  
於記事今方成兩門固不足煩大手筆也是事姑置獨  
喜退然耕夫而當世部使者不遠千里一書而訪問之  
意者此山識某猶某之識此山也並田廬而北荒山餘  
十畝歸則苦草其間號歸來館手自塗墍作勞小休意  
行幽谷中發土得石發石得泉殆天久閉藏始出以娛

其老者豈畸於人者不畸於天而其草茅而其翫靡則不但此山識之老夫固亦識之矣一笑一笑欲言何限遽數之不能終式遙召綸野服迎拜

答葉兄

某南山采杞北山采薇為口正忙而舍弟守書不肯去然則某之草野不特雲厓不見知雖舍弟不知也詩壇復古前書益未盡其嫩雲厓割裂其書以為跋是真不知也繇今觀之韓柳歐蘇特其土苴者耳雖吾夫子

且將北面壇下何也夫子之於詩也敢刪而不敢復也  
夫子不能復而雲厓建壇以復之其將使夫子北面非  
歟謹奉以還某固不得與於斯文也

答趙推

某維農事欲動一雨膏之共惟有婉其籌式金式玉某  
屬有天幸得與同僚甚喜其戇直也而濟之以溫恭某  
踈頑也而佐之以縝密所謂和如和羹某既賜矣汲黯  
妄發竟以罪移驅車盡境而後還真是追送不作遠者

一書旋踵問勞渠渠此意何可忘也耕釣寬寂與世固不相聞英妙之年環秀之抱惟勉旃仕學以就遠業而已

答標尉

某金陵一別驛亭柳既三四青矣意鷓鴣飛下飄飄西臺而乃者伯氏墨其縑以來知有變故二親棄榮養相繼歸仙佛中人子之情何可堪忍遠日既迫攀慕奈何幽堂之銘自當屬之大手筆某固非其人也再四辭不

獲則取行述刪定之筆陋墨凡正恐無以仰當孝子順  
孫之意耳

答蔡憲

某碌碌亡竒嘗誤知獎有一不善惟恐司馬端明知之  
比在南康自謂可以對越無負獨天與褊狹疾惡如風  
勇決不疑上累函蓋然觀古人於傷風敗俗之事不敢  
少恕晦庵在郡尤惡此等蓋所謂士者豈以其能伸紙  
行墨而已耶行如市人而口誦聖言則虎而翼者也況

不誦聖言而誦滌時文哉世降風移始有惡傷其類之說不知以此為類則我亦何等類也晉殺鳴犢夫子及河而返非為其殺大夫也為其殺賢大夫也若少正卯則夫子自誅之矣今之摸稜不事事而以容奸長惡為近厚者不過憂讒畏謗之私意耳非賢於夫子也李廣殺霸陵尉固是武夫悍將之為然今將軍尚不得夜行何故也之語亦人情所不能堪也不惟此也故將軍而一亭侯得呵辱之則下陵上替將無以為國矣故雖不

以法殺一尉而武帝報之曰報忿除害朕之所圖於將軍也此明執事所謂豈易與俗人言者某不足以當耳某謹重拜以謝夫以此輩皆是黥吏之子孫而程有開者其父身為客將見此尚存而其子可無禮太守乎某輒盡布之惟明執事力主維之名分幸甚風教幸甚

答方教

某維莫之春思樂泮水共惟閭閻侃侃涵泳聖涯言采其芹淑我多士某宛其老矣無以亢宗平生聞莆中詩

書之傳於吾譜莫強焉而某也世農聚族而居者率芸夫莠子耳奚其攀附之敢不圖易地有廣文先生者在方將執經以往而攷世系焉某其何幸然聞上厲精思治旦暮間當給札玉堂使條天下事則又未知得相從麗澤之兌以遂其志否某天與禍狹幾為世之狼籍人執事所謂齧諂子之銚抗上流之鋒真草茅耳然地以此易天固不以此易也惟執事矯揉之某敢無順下風而立



又

某於函牘外更得小楷疊疊數百言意密情親不兄弟語翅也吾宗之盛莫如莆中而某則自鄩以下無譏者焉狄武襄不敢拜狄梁公此故之以今也何幸將從執事者間之至如民瘼當何廖士習當何媿尤某之所傾耳以聽降心以從者也欲言何限遽數之不能終

答高宰

某維莫之春桑雉新乳共惟琴意嫺雅以恬以熙一仁

所濡耕野秀綠某往年識鶴山翩然列僊之癯也詩書之派寔自諸高則既知海內有名門矣不圖易地及君同寮出家集共讀之當自茲始郡縣相與休戚一家勿欺此心何事不濟曩在廬阜其宰脩水者亦華宗也縣無乏事郡無疾呼不過兄弟語耳謂予不信試嘗諗之上嘉蜀珍陳在廟璉旦暮間當立文石斑矣恐某之不得澤餘潤也某一生骭體又坐觸權貴人是行益再四辭藐不見聽侯誰在矣使蒙其成某甚不能無望於明

府行矣胥晤盡略敬彛

答費宰

某伏以一犁雨足農務村村共惟仁聲戴塗民以蘇醒  
山川奔屬某氓也初上其賤姓名於贊賓者璽而件具  
之猶以為簡抑其木石之與居鹿豕之與游蓋林邱之  
耕夫甕牖之退士也於竿櫓乎何有請略之始某出而  
遊四方時聞士大夫之賢業也有年數矣頡頏飛舉之  
珮簪弄明月之珠蓋某前乎此之願焉而不可得者也

不圖僻左之縣介在山峽之間而明執事不鄙辱臨之  
疲民其遂瘳乎然則相携春雨之鉏對卧夕陽之犢蓋  
某今乎此之安焉而得自遂者也獨念拱壁大寶方當  
與天球河圖陳在東序百里豈展驥地耶夜下恩書遙  
入王覲恐民氓之不得久其澤耳某雖不肖似平生非  
公事不至偃室但能與芸夫莢子安樂耕桑惟明執事  
其鑒之羣仙在行瑤玉先後其訊興居焉某奚其慙之  
敢

答鄭提管

某伏辱頌使之臨雖未啓緘固已心知其為存念矣開  
闔一再仰見高情使自為謀寧復至此感激大不可言  
惟是某六十之年日就衰朽自計塵忝於今二十有三  
年大都五合六聚僅成七考以此山林之性已痼仕宦  
之路甚生今殆言農夫重農夫無往而非農夫也山猿  
野鹿豈堪位置於鸞和之間追念平生亦欲少有以自  
見而與世落落名實不浮費人提撕乃至於此使吾君

吾相重違名法從之請而予之是亦不過犬馬畜臣本  
非繫維駒谷之意淵衷鈞抱其將以某為何人前此  
乞祠政恐溘先朝露破戒為一燈之續耳既已得此他  
復何求戶曹不愛裏言垂念鄉晚此固今人所無也某  
不可無一書謝之然曲其辭以干之耶則非不肖之雅  
意直其辭以絕之耶則拂君子之盛心其姑少徐某終  
當道所以感刻不忘也

答汪運幹

某方飯牛於渚，袞暑中殊曠曠也。廼得執事者書，諷讀醒然。受賜無量。抑執事之所以殷勤其文辭千數百言而未已者，豈非深攻玉之憾，而得獻璞之則者耶？楚然似人，則吐其胃中之介介耳。不然，某不足與語此也。昌黎師說自其當時固以為蜀之日越之雪矣。風俗趨薄如水之就下，以今視昔，且又四五百年天地中間，父之不父子之不予，而兄弟之不兄弟者，何數？況所謂師弟子云也。以柳子厚之不可學，韓愈氏之可猶未為善學。

昌黎者而某奚其敢且執事之師云者文乎爾文乎爾則雖幽怨如離騷憤悱如太史公固不若先秦古書之師也先秦古書雖辨詭如左氏雅興如莊周固不若先聖法言之師也執事能自得師則此諸書者具在有易焉以觀其曠有詩焉以觀其情有書焉以觀其治有春秋焉以觀其斷凡天地之所以奠江河之所以流君臣父子之所以立而古今天下國家之所以治與亂盡在是矣夫豈曰文乎爾若子厚之不敢於為賤人固曰非



有嫌於其文也某則曰懼有嫌於其文也乞巧之文招  
海賈之文斬曲几之文謂子厚而無嫌於此乎然則子  
厚之不敢為師亦非吾之所願師也執事所以枉教者  
非某所敢當則以上之執訊而已

答龔國錄

某卧雲牛下所與游者非山南之芸夫則溪北之漁子  
也當世之士鄙而棄之叟亦且與世忘矣為詩踏雪過  
茆屋不領一騎驚山猿前日執事之顧我厚甚門前車

馬倦逢迎塵滿荷衣不堪着則不自意老農之貧病不能出門戶也夜半扣角有懷其人而棲息不同奚其書之敢琳琅金薤忽落巖扉自視缺然何以得此有如一世儒彥合在帝旁政今報成會且歸矣安得摩挲西園之石淋漓北海之樽酒酣氣豪一吐其胃中之浩浩者而某方屏廢孤負此生東望屏星有嘅其嘆

答許教

某與執事不面者幾年不書者亦幾年矣山塢荒寒忽

奉翰題真如拱壁大寶之墮吾前也一詩一記開闔不能釋手斯亦奇矣名其處曰天多許得無大傷於奇乎蓋執事平生所為文往往亦坐此某故嘗以為易奇而法昌黎之言也好奇自是文章一病山谷之言也然則學者將何從秋崖曰奇可也好奇不可也夫人而好奇也夫人而不能奇也長江大河滔滔汙汙此豈有意於奇哉而奇在是矣至其絕呂梁衝砥柱則堰而風雷噴薄魚龍悲嘯又有不得而不奇者若夫激溝瀆之頑石

而落之為犇放舒之為淪漣不謂不奇而與夫長江大河之滔滔汙汙忽然而絕呂梁衝底柱之奇則有間矣執事以為何如寒暄常談一切掃去無則與塞白以故聊復狂言如此惟執事者教之阿戎妙年筆勢已自汗漫厭家鷄而嗜野鷺則非所敢聞

欽定四庫全書

秋崖集卷二十八

宋 方岳 撰

簡劄

答范丞相

維元老大臣夷逸於林丘之幽高蹈於事物之表山君  
川后時節起居其年壽等喬松福嘏彌子孫一念之仁  
簡在上帝理固然也訊之蔣幹知骨清神健萬萬坐政

事堂時曾中乾坤同一泰定甚盛甚休乃聞無地樓臺  
至今猶往來傳舍只觀此事亦是近世宰相所無獨恨  
不能從一門生兩兒子之間舉手以挹溪山勝處耳某  
無慮五六乞倅終不與既乃頭銜換一字遂不敢以白  
今丞相無舊故誰當知之翹跂門牆神爽飛越

答同官

某屬有天幸得從羣仙飛珮之後爐亭夜話隱隱有金  
石聲而煙水蒼茫翩其駕蓮舟讀玉書而去梧風竹雨

詩夢亦寒琅。畫飛來真所謂。楚然足音也。玉麟一角與  
世作儀。崑崙蓬萊。寧久羞薄。獨恨某輩碌碌。分當歸耕  
方且。丐一負外。倅恐不得。迎拜上東門外耳。別紙垂諭  
如某規行矩步。不敢失尺寸者。何能為度外事耶。幸為  
我多謝方君功名之亨。固自有時也。瞻晤未涯。神爽飛  
越。

答陳料院

某從飛霞之珮。餘二十年。夫亦有舊故矣。函書每下。則

必釀虛譽飾浮文如仰惟等語抑何世俗我也甚為執  
事者不取敢略金陵天下形勝表裏江淮煙草夕陽六  
朝之遺事故歷歷也暇日亦嘗倚青龍之浦溯白鷺之  
洲舉觴酌酢以壽經畧南北之畫乎今何如時賞心風  
月自宜束高閣以俟太平也如聞餉計塵土亦空所在  
皆然寧不直如此廩廩願言出所素蘊為國良圖同舟  
風波轉眼又秋高矣欲言何限遽數之不能終

答吳兄



某維暑風初暄綠氣窈窈書林夷逸冲想甚休某一別  
垂二十稔老非故吾江山愁予不知人世事之幾變更  
也乃春阿連至得書恍然訊之則擊楫渡江而北矣前  
書未報今書踵來不惟不督過之且愈益厚之某之愧  
茲甚某晚得一第不補遺餘初佐淮東軍以職事迂都  
督府無何督相坐廟堂矣高卧牛下謂休此生化絃既  
更亦與弓招之一山麇野鹿豈堪樊而圈之遄亦當去  
此耳尊翁今官何所過庭幸為道問訊何如

答陳司直

某之於執事交疎而心親勢睽而道合與世之詡詡相  
逐逐者有間矣去之不能二百里而江山愁予塵埃迷  
人甚恨交一臂而失也人間之世事變萬端英英白雲  
忽已蒼狗要是不滿虎溪一笑而弄精鬼者顧自謂奇  
特亦可歎已劉忠烈表表如此輒書數語繫老筆之後  
真所謂珠玉在側覺我形穢也會且歸矣臨紙惘然

答陳提幹

某廼者過鄭公鄉迂勞之使里至至則授以大館連日夜相燕留去又載之輕舟所以為行者之慮甚至世所謂親戚雅故何以過此一步一感言莫能殫獨恨所至膠舟與軍饟爭道於牛渚之水僅而獲濟所假舟亦良苦矣旱既日甚念亦未可以還留之京江豈不知此輩廢務而其勢有不容已者茲稟嚴戒方敢遣回要非皇恐兩字所能盡也

答張丞

某問者閤焉不聞問良用詹馳有來誨函見大夫之所  
以顧惠其岷者甚厚不規而頌如非所望何某歸思浩  
然亦既買舟載月矣山靈勒回俗士駕田園久蕪菊籬  
正秋終當訪里父老南山下耳王琴堂政事乃爾竟亦  
不免為之歎息祈門蔽爾邑民無十金之產更堪摧剥  
耶惟執事者手摩拊之某與受其賜

答應武諭

某伏以江城霜曉梅意欲春恭惟小紆玉班相我藩翰

有嚴有翼某不學甚乃得頡頏九霞飛珮相從於西  
雖  
爐亭夜寒金石隱隱所謂藝苑手祕寶文堂耳驚霆樂  
莫樂於此矣孤鶴飛去忽舉手而謝廬教瞻之在前有  
慨其歎至今清夢猶時時聞胥濤萬馬之奔也某何為  
者顧從中秘書出參軍畫道山能幾日之客又墮塵綠  
意平生故人亦既羞薄之矣一書二千里依依交情乃  
獨能不羸官我耶幸甚幸甚六一翁之鄉里以道德文  
章名天下者相望暇日亦嘗訪平園之草木訊澹庵之

間巷乎遺書滿家應接不暇為況想甚適正自不必祝  
餐飯也別紙敬悉此曹此態在在皆然瞻言何時相與  
傾倒

答葉正言

某屬方拜狀欲附通行矣明日使星至又得所賜書伏  
而讀之則揆時寒暄撫問餐飯甚非天子諫官所以待  
庶寮體也然則某之為竿櫓敬者當何如前書既已畧  
之今書不敢不情也以情事正言某知免於戾矣淮堧

一稔遠勝江浙又幸邊烽不動汭拾淨盡似可以苟且  
過此厄運却未知來春何如耳敵國外患要與法家拂  
士同恐不可遽以是為賀如某山林鄙朴士每事迂闊  
以故落落與世無緣今此羈縻殆是自嫌不能相容之  
名犬馬畜之耳正言其亦憐悼之否乎龍涎薰香共承  
嘉惠時時橫書卷對之但覺德馨襲人不知冰霜之凜  
可畏也

答程都大

某比讀除目竊論誕分侯綬就擁使軺過家同衣繡之  
榮接畛幸褰帷之間光華所被甚盛甚休始某此來亦  
欲一布心腹蓬山之集謂可晤言舉手而謝廬敖九霞  
之飛珮遠矣送目詹悵無任此情今一車以南一車以  
北所謂上有加餐飯下有長相思而已

又

某久出乍歸墻屋穿穴旁風上雨手自苫茅苴補之有  
從籬竇呼問之者曰此為杜工部家乎夫子安在微視



之則斜封三印蓋當路使者書急洗墜塗之泥拱揖而  
諾曰予是也誠不自意溪煙山雨之外猶為明執事所  
訾省幸甚感甚始某金陵之役日日詣府辭行不暇與  
明執事道心曲也不得已而去則所謂髯參短簿能令  
公喜怒者正自不滿人意蓋嘗拂衣欲徑歸田矣輒為  
督樞勒回之丐祠之章未免自從某所上廟堂賜之翰  
謂將召之著庭督府有書欲留只得中輟然則廬山之  
命其廟堂意耶某亦何人乃繼鄉先儒之後且得此郡

之歲適皆四十有九遺書所在某何足以知之然未敢遽引辭政以權郎予待闕軍壘恐或者有薄淮陽之疑耳闕到即上免牘笑相望正遠敢布腹心中朝如明執事者幾人豈宜一日去上旁近芝山之酒定非久留公處也某無任延竚

答方僉

某竹扉雨寒有剥啄前者手其書恍不能記熟何也徐讀徐問則知執事者脫鵷冠為新進士而今少遊即是

太虛甚盛甚休西笑入秦此興固不淺萊山堂記蓋嘗  
略識之矣驂駟馳九軌之道中間自無駐足處功名不  
足為執事言也一書萬里忽落雲耕月釣之濱豈猶未  
知其寂寞耶始金陵之行雅非鄙朴者之意丐祠得壘  
需次兩年亦幸返吾屠羊得以暇日理鋤耒耳兩地相  
望各天一涯棲息不同無任注仰

答黃正奏

某伏以雨勒花寒一晴方競恭惟討論入對星宿光芒

某日瑣春官與一時名儒鉅官焚圖告穹昊退而奏號  
上前夜漏下十刻御史以璽封入羣公盛服執事則大  
名在焉一軍皆驚不獨為吾鄉喜也祈山久寂寞氣象  
頓還西南諸峯競秀崛起斯亦奇矣而某也陳人也道  
山幾何日風輒引之而去一書至今未能與世無緣丐  
祠之章再三上出幕得壘猶幸以暇日理鋤耒耳翮其  
飛翰極佩盛心方苦草廬未涯佳晤所覲益宏遠業亟  
上奏篇

答趙寺丞

某歸耕祈下日與遊者芸夫荒子而老硯荒矣賢太守  
與民介福揭虔妥靈乃不鄙屬筆於牛衣之間刻之廟  
道字畫褊陋不足以導迎景休而執事者一念在焉神  
人其忘諸某敢不與里父老再拜受貺

答林兄

某窮山老樵也然於四方之奇人逸士竊嘗傾心焉有  
書自東乃知崇蘭之佩芙蓉之棠近在吾州風月堂邊

而不得面也鴈蕩妙天下四靈所鈞遊處固多詩人而  
今又得君獨恨某不足與言奚其題目之敢田家作苦  
一再讀之快哉快哉乃姑記一日之適如此非跋語也

答洪宗論

某屬以見大夫之請敢犯不韙某知罪矣共承墨妙宛  
然清揚一時鷺侶鷗朋亦自驚喜先相公奏議蓋當時  
與天下賢士夫傳誦以熟者墨本分教如獲拱璧盟澗  
泉熏石鼎而讀之不覺發嘆以為大音不聞蓬萊宮又

幾何年於此矣某雖不肖猶幸一識老仙嘗得尺牘數  
行有下馬之氣如虹應門老走當自識其不凡之語而  
某老益亡竒大負此帖第緋襲之以為子孫藏耳敢因  
謝致幅併及其所以自幸於名門者如此早既太甚山  
邑蓋連四五年如是歸耕望一稔又墮渺茫李將軍固  
數竒也上梁文誰實傳醜輒往奉一笑

又

某窮居山間自五月至於八月不雨不惟薄田盡摘搢

惛然抱甕而汲久無可濯可湘處也廼夜半簷陋如瀑  
布聲雖無救枯旱之苗蹶然起飯牛畦麥矣震雷以電  
適又是秋甲子吾儕猷猷之憂何時而已也行李問訊  
鷗鷺為驚不自意其一介氓得此於見大夫之賢者敢  
不再拜以無忘盛心先相公以一世儒宗丕顯謚冊發  
揚徽美上軼歐蘇甚盛甚休某雖不材然嘗辱一字之  
褒恃以自壯需錄瑤帖謹具如左方某因有區區之愚  
請於下執事先子初得封其制詞亦出老仙之手欲得



大筆為取善慶兩字書之以扁先祠是公家再世有造於某也豈不幸甚

答潘兄

某麋鹿之野乍返吾廬方決驟山林自與世絕書疏非所堪也執事者作小楷具件幅若施於所敬則有驚而避耳某謹以上之典史氏而告之曰某祈下之鄙細人不得與於斯文也少時不解事率意妄作今老矣每為之縮頸咋舌而噬臍執事出所有使品題之某奚僭之

敢然恐執事之不予諒也掛名其間珠玉在前覺我形穢某無任主臣

答蔡憲

某歸耕牛下益山翁溪友之所狎易而富兒俗子之所排突也却使者不有其貴肯問訊於寂寞之濱高誼凜然感歎無數每記爐亭誨語以為廟堂嘗訪人物明執事謂眼中所見獨此可人讀今所賜書與前語吾相者無以異雖漆雕開所謂吾斯之未能信而亦決知明執

事發於至誠非尋常世俗竿牘浮虛之談也顧某不學  
祇益懼爾敢不夙夜敬戒以無忘知已

答吳丈

某維久枯得雨纔有秋聲共惟冲想自願相在林壑某  
雨別山寺於今幾何年老成典刑栩栩入夢意洲上之  
竹玉立固無恙而鷺朋鷗侶相與往來於沙煙溪月之  
間甚適也何物小子過厓音書乃知老仙超然有燕翼  
子而東閣郎君能自修潔取友必端君家世不乏季子

矣甚盛甚休記文當屬大手筆某何以堪之又念辱交  
賢父子間而先友和仲甥館之自出也願徐之母迫苦  
屋小休敢不作數行字附仲亨求教未間尊生自愛以  
引以恬

答胡兄

某辱詩鑲石清矣哉二妙也雪巖雲壁鳬泛而龜藏君  
之規我多矣正恐豪奪高齋風月澗松不能無語耳珍  
感珍感

答金臨江

某自里人不戒於火先廬燼焉蓋無所居者十餘年矣  
歸自江上手苦草堂斧斤雜然非匠事不接於耳也千  
騎既束之數日始有為某言者為之頓足扼腕而噬臍  
執事者不惟不督過之且賜之翰鄉長上之於後一輩  
其勤勤乃爾某知愧矣世涂日狹何往而非風波歸興  
浩然傲睨林壑方將左花右竹以寄吾高而宣室受釐  
已有久不見賈之歎行矣王覲恐非芳薌一覽所能留

也

答趙運管

某十有餘年之別落落參辰老我山林幾不記車中半  
面矣黃獨無苗山雪盛又洗長鑱有朱兩轡正自不滿  
一笑晦翁書在而半生所聞五老峯今不是夢山負予  
耶予負山耶惟明執事教之

答趙教授

某不學幸甚得與麟鬻犀彥翔集於立教堂下見執事

粹然玉潤心竊敬之不圖此來任棠固在邦域之中也  
朋友與君臣父子而等鉞之石之執事與有責焉摩挲  
民力之窮爬剔胥奸之蠹所以教者似矣抑言其證而  
不言其方何也某敢以請某所謂以法為師弟子者執  
事諱其名弗稱足以厚薄夫矣然繫銜則固職方氏郡  
縣也獨可得改歟願繼自今無然遙矣晤言寫我幽抱

答胡文叔

某一生骭髀所至草茅南康俯重湖餽舟湊集往往挺

乃隳突市無寧居適會湖廣綱梢豪據石閘薄人於險  
竟致漂淪有訴於庭為昌黎者安得不追而杖之秋壑  
怒焉顓匣具析某意鄰路體不當爾一判頗自痛快固  
知其不見恕也廟堂似不以彼為直董董易地失一老  
兵得一老兵要無虧於名實而某固不可無恥又挈挈  
而南也一丐祠一丐罷皆不許而昨日邵武人已至頗  
費區處後山種梅十七八活歸又趨冬晴築一草塘只  
可挾冊其中手畦菰韭以了此生耳野處集甚愜所欲



見獨編抄工力百倍板行儻然取之得無太傷廉乎願  
少留山房讀一過即奉趙壁歸矣龐老何日入城府傾  
倒欲言

答費司法

某維暮之春綠陰清美共惟懷章容與適上風霆亨衢  
方開某屬有天幸執事者駕飛雲而辱臨之楚山叢叢  
快此一識所恨者秋風斷鴻鴈之行明月還鵲鷁之影  
不得相與掬窪樽醉崖石以吐其胃中之耿耿者歲月

遽如許乃猶擁書家林未肯為幕府屈耶若某者隻字  
不至中朝不知何為忽有陪擬乃復為結一重案又可  
笑也知縣公墓刻以嚴戒不得辭筆墨凡蕪於謝奚有  
伏讀唯有感媿山林鍾鼎棲息不同瞻望無期第深注  
仰

答汪兄

某歸老秋崖下所與遊者芸夫莧子耳人間書疏要非  
所堪顧小楷而條件之此山林野人之所驚而避也謹

以上之執訊者潘君詩跋亦何取於摧頽不武之人掛  
名其間使旁觀者為之捧腹兄殆不無過試一取讀而  
還示教焉某至悵

答許知縣

某山林之習未除麋鹿之性故野一生落落與世無緣  
歸自金陵方住雲半間畦菜一席不自意別猿鶴矣趣  
行有旨貿貿然來誰實知者函書盈几忽得何所獨無  
芳草之騷寫我心兮三讀太息有此令尹吾知免夫揚

瀾左蠹朝夕之春撞恐自有雲銷風止水鏡淨時也頗  
哀老子使蒙其成某也抑何幸

答林倅

某荷鋤畦雨有軍將持斜封三印至者驚走草廬下不  
自意見大夫能拊存其一介氓如此方緹屏過巖邑某  
實病不能興懼前驅之不予諒也輿曳上謁雖心知其  
落落如長松天矯冰崖雪壑之上定自非世間凡草木  
而某也一語而三引其氣不能攀飛車接英論也共此

明月有懷其人一書自東共承嘉惠不謂荒寒漁釣之處見此甘草下拜珍感言不盡謝

答楊元謹

某往離金陵時行李卒卒亦嘗厓略數行字道所以負朋友之意讀今所惠翰似覺墮石頭驛水中矣吾儕用世必諫行言聽然後可以士薦言不重則併士輕不若拂袖而歸予輕者猶予重也寧使人失士不可使我失身否則山中白雲何面相見天下事大略如此請姑置之

獨念老書生歸耕窮鬼亦可以見貸矣一旱酷甚望秋  
便哦飯不足之詩未知此後此腹如何而揚子雲終不  
解事乃記其初度歌白雪而壽之竹逕草亭孤此妙曲  
未知何日傾倒欲言

答汪知觀

某緬惟梅花欲雪鶴骨清寒碧玉森森高出塵外恨不  
得一詣其所相與道話宸章飛落增重琳房非師何以  
得此拜手瞻敬敢不為山川賀賤生碌碌久已厭之正

君家老師所謂吾有大患者也師何為不守家法更祝  
長年感意則深未有以謝皇恐

答陳教

某惟博士非它官比一語一嘿師嚴道尊某將取式焉  
顧懔懔厖厖解何記室之後故筆精墨妙一紙書畧已  
窺斑侯喜輩伏矣抑所望於執事先生者不在茲也知  
為所齋昆玉喜甚合并何以教之敢不三拱

答高宰

某惟鶴山負一世之望慶源演迤實自諸高詩書之傳  
未艾也執事者出其家學絃歌斯民夫奚有於邑之難  
錯節盤根方見利器某何幸蒙成焉縮手袖間使汗顏  
於血指大匠必不肯坐而旁觀也明以告我聞斯行之

答曹工部

某自兒時聞昌谷先生以斯道之傳慨然為已任後生  
晚進猶得聞乾淳以來諸老之緒餘甚願執鞭焉而未  
能也非才假守適在鄭公之鄉不見其人得見其子孫



斯可矣青真之靶弭節里門非天之以工部惠教其繆  
守乎過矣式于木之間拜手以請

答劉知府

某惟乞祠不獲貿然來思如聞于木之間去城纔咫尺  
天之以賢寓公惠幸某也康廬天下勝處一童一鶴往  
來乎南山之北北山之南其與洪湏吏塵者相去豈但  
弱水隔也須我暇矣式從公遊

答鄭運幹

某山林深密與世殆不相聞屋後一塢荒閒真漫郎所謂不隔人家便是山也近開竹徑種梅將百本作草亭其間亦足供老子杖屨矣此外不復計也安得奉琴尊相與一笑又念執事者方鞿青冥之軫意欲鞭鸞鳳而上之未有此暇耳歸耕厓下早不逢年生日酒螯甚負左右手不圖記憶於千數百里之外遙遙送將發函讀之皆非窮人家所有方欲捲錦鯨還客而子用大聞弟持不可則既下拜矣珍感珍感生日諸弟作酒方一再

行徑醉去狂歌賀新郎曲今往一咲或出或處棲宿不  
同山中白雲難以持贈惟有磨向

答程教

某惟嘉平之月天地將春恭惟獨抱遺經行矣重席有  
斐有翼某宛其老矣意與年凋負暄草亭戀戀黃綿襖  
子不能起又豈辦事治筆墨與世俗相酬酢禮文間者  
哉靄峯倚天惟有磨跂妙語飛下方知歲行且周有事  
西疇又添老大但拭目吾道之泰如廣文諸公衮衮發

白虎之尊以強人意耳遠與歲別惟厚自金玉式遄召  
綸

答趙提刑送春衣冬綃

某投閒林壑得耕侯土已幸矣敢復他望有司繼廩忽  
焉得二十縑歲暮天寒不復使紫鳳天吳曲折短褐今  
工部定勝舊工部矣一笑一笑

答朱尉

某伏以作噩之春乾元用九恭惟僊曹清峻畫諾賓僚

有翼有嚴某草廬雲臥不知歲月之老冰題到手驛亭  
柳又依約矣執事駕驂騶之御出門問塗振鬣長鳴便  
有一訊千里之興朝崑崙而夕玄圃殆未可量也某老  
矣藝菰兩席滋蘭一畦正亦足了此生無復他望故人  
不遐棄寄聲山民照之以銀燭之光勵之以石燐之辣  
而未知今我之闇時情而螫世味也遡風孤鶩敢拜執  
事者之重勤

答胡簿

某伏以天地既春草木欣豫共惟譽處休洽公車交書  
有嚴有翼某自上東門一別驛亭柳幾青青矣田家作  
苦時或嘿數平生故人意執事者久已給札玉堂使條  
天下事馬周輩不足道也兩使者一世之望出半言從  
吏之便當背負青天而上一疏累數百言豈特四輩召  
而已某自屏迹田里一字不入帝城常所欲游又皆耘  
夫莠子無能道古今而譽盛歟者孤負奈何華炬見分  
厚意無以報未知何日傾倒所懷

答謝司戶

某竊伏草萊野哉其麋鹿耳平生聞三峽之雪五老之雲為天下最佳處奇人勝士往往家焉駕黃犢於喬松飛瀑之間久有此興乞祠得壘其貿貿然來者山故之以也至則錢穀之問犯其慮簿書之塵裝其懷山吾面焉而不吾即也奈何一書自西孤響逸發顧所謂浩然之氣匪某其人山近而遠焉浩然者不爾其概株拘也曷日反魯傾倒欲懷

答陳常博

某去違門牆俯仰年歲雖煢然在疚生意不聊而省發覺悟之機洗濯磨淬之助未嘗一日置也方麗澤之聚蒙潤不知至離羣索居乃復動念耳待盡壘室姓名不齒於諸公間郵傳及門恍然莫知所以伏拜書教讀未既而泣下所謂攀號摧剥處正是古人發深省處某敢不夙夜以無忘誨言創鉅痛仍何有於學然少時蕩搖於意念之萌驅馳於血氣之使在今皆以荒迷忘之矣



獨念先母一生貧苦不及祿金之養此不肖子不孝之罪何知其他刊委云云已具彙仲書中惟習庵坐進此道惠幸後學謹上狀不宣

答吳殿撰

某從元戎於高沙凡七日而歸驅馳鞍馬間曾幾何而已有疲曳之態腐儒真無用也正此盤礴雲灑飛來為之矍然起拜南徐寇攘甫定氣象葦然若非兼領總司自是掣肘伏惟百廢經始不無勞勩乃能從容整暇於

翰墨間甚盛甚休某始為此來意謂十日別耳忽忽踰月浩然思尊三五日間恐得一至麾下矣

答李實夫

某至自高沙得雪雅於凡間梧桐月多秋思策策於其下作商聲歌之宋玉之悲故在不再讀喚起江南鱸蓴之夢時事如此既不能得尺寸以靜鯨鯢之濤瀾又不能退林麓以娛猿鶴之煙霏不知竟何為也負負何

言

答史湘潭

某一別幾何年恍然不記鷗鵬之徙天池也鄭秋此來  
有書銜袖出示之則琅畫爛然始知春洽於湖湘之間  
雲飛於嶽麓之表碧蘅紅杜渺予芳洲蓋屈大夫之離  
騷故無恙而九歌之遺響猶在也暇日亦嘗壺觴以吊  
靈均之古愁而發吾胃中之浩浩者乎如此佳處執事  
乃勇於去之何維揚雖古都會然所謂朱簾十里迷樓  
九曲二十四橋風月今不知在何許然則移執事為元

僚湘水得有語獨吾曹十餘年之別忽此同寅喜當如何

答洪侍郎

某昨已聞之吳農卿以為侍郎齒及下士思欲見之茲拜翰題勤勤懃懃不知何以得此惟天開一泰羣賢萃朝鳳鳴朝陽涵海嘉賴如某等輩亦願一望立玉之光然起從田間山林之鄙朴故在惟君子愛人以德毋使之超超囁嚅於門下吏以沮其平生韋布之氣不勝幸

甚

答胡文叔

某痴不解事不知區區者適為形役蓋自二月初犇走  
往來曾無寧日問訊竹間水石沙頭鷗鷺已望望有鄙  
我意亦知愧矣淮鄉士友未必如中州盛鼠朴知可售  
否從此相望夢墮天一涯玉我於成正不隔此衣帶水  
也雪雲釀寒惟萬萬自重

答葉巡檢

某維時霜晴寒意未競恭惟某官謹護邊瑣百爾相攸  
台候動止萬福某曩上謁於計臺司賓者有客負隅坐  
亟問之則鵠冠子也徐察之則鵠冠子而非也去之幾  
何時有移書僕者手其函恍如目其題情如啓而讀則  
向負隅坐者也憮然嘉之抑其言曰吾遽徑門弟子也  
東閣郎君薦禰正平甚力而此書竟未至得無有石頭  
事否僕幸與侍郎接又幸與常簿厚不可以莫之答也  
其後之忽聞郎狀常簿我豈入臺矣官盛近諛容可以

莫之答也其止之是以若此其臯也幸為我寄聲烏府  
先生而後書愈不敢入帝城矣未見厚自愛重

答葉華父

某伏以寒氣曉集南枝生春共惟某官翱翔諸公之間  
鋪繹六藝之粹凡爾次舍求福不回某旦旦望九華山  
渺立塵外以為何當挾太乙青藜杖攜李長吉古錦囊  
以從兄於泉石佳處而不知乃在京華軟紅中也某從  
田間起為吏事事生疏每思曩時雲澗雪崖與山僧野

老幾醉幾醒今不可復得老人以吾落邊上舍之而歸  
視其家則廐門無稚子掃地無老婢兄以吾為樂於此  
乎官屋荒落門前之雀可羅而人亦知其愚癖無敢以  
貨來者月俸不滿十萬錢計口而食日所受用則老禿  
中書君而兄來索上色牋兄以吾貧為有異於疇昔乎  
何其不相知也使人索書甚古有懷欲言不能既

答吳運幹

某鄉扮後一輩知有達尊者三十年相望家山百里而



近乃不得從小奚奴晉拜履舄亦枉為嚴助邑子矣效  
官邊鄙竊聞薦紳大夫稱道盛歟為之瞿然汗下以慙  
則自訟曰抑吾互鄉獨未踐名氏於筦記者敢圖謙下  
灑翰先之老成人之典刑固自超出流俗萬萬也執事  
以二十年前取科第乃今猶着集英殿下舊青衫畫諾  
臺幙得無有鬱鬱於此者乎何時弭節行臺快此先覩

答宋尉

某誤辱制垣剡之帥幕此固采葑無問下體之意而又

分炙於不自言之人豈不紳佩惟退揆其私有不自安者堂帖至已多日始猶秘之會邸吏報行遂不可掩至今踧踖辭受兩難鄉曲老成人當有苦語以相鍼砭而奚以賀為某謹再拜謝不敢當

答楊宰

某以文學掾留莫府幸甚一再瞻立玉之光正欲從容燕琴願聞先生勲烈將掾觚染翰以庶幾柳河東紀段太尉遺事而馬首東矣正此翹企有來環畫乃以某辱

在帥幕勤渠而賜慶問焉某前月初始聞之懇辭不獲  
朝命既下進退兩難至今未之敢承亦惟執事者所以  
教何時飛舄洗此傾瞻

答陳守

某二十年前舊民冉冉老矣脫夫須起民伍幸接茵憑  
方將從容話疇昔而執事者丐麾去惘惘不自己呼車  
造門乃聞蘋洲歸棹西矣重悵然也日夜翹注有來音  
書其睠睠一介氓顧如此感不勝情某濫此序遷正自

愧見二三子甘棠舊地意必有苦語相砭鍼頌而不規  
則又大失望長才磊磊處繁劇如破竹此豈晴簷傍日  
婆娑負暄者耶式遄召綸迎拜鵷首

答趙運屬

某與明執事為同年生於今垂二十年意者青真之靶  
凌厲鸞凰固已舉手而謝盧敖久矣得所惠翰無以大  
異於巖寺邂逅時為之太息士固有不遭如此蒼顏白  
髮非復曩所見一生骭髀與世少諧始以議不合丐祠

猥亦予壘蓬藿深密若將終焉忽聞縮戌之期亟上前  
請趣行有旨顧瞻茫然翮其貺書所以告語者甚備非  
篤叙年盟不及是何感之如抑聞蠹穴疽根殊費䟽剔  
尚賴一二教之此非面不能盡也草草占復別容式干  
木之間以請

答程允

某與世應酬不過兔園冊中語耳諸公愛而不知其慙  
至欲刻畫無鹽蓋亦數數謝不敢今已久為梵率寺家

矣君其問諸劉復愚

答趙尉

某辱分碑刻所以愛我者至矣抑人有言已知富不如貧貴不如賤特未知生之與死何如耳以某之鄙等作如是觀屏廢田廬豈堪棲壁獨隸古可愛當時出舒卷髮髻其似近也千感百謝

答謝太監

某閉門黃葉之村久已無意人間世矣獨憾不得進瞻

犀玉之表剽聞笙鶴之音投老空山永絕此望不圖星  
宿明潤時焉流光有如不振之踪忽有啓擬平生方拙  
莫知所從意其為鄉參汲引之盛心恐非丞相意不得  
不固以辭也方控於朝未敢稱謝而屈鐵盤銀之字裁  
雲組霧之辭已自飛到山人家矣拜手稽首感塞彌襟  
竣得旨揮別容顙布

又

某茲詔大府賓賢羣賢咸集備禮盛樂歌鹿鳴之三而

送之甚盛舉也某以山林僻左莫與榮觀何貺如之更  
勤折俎某謹再拜受賜而賡勸駕之章瓦缶烏烏穀亂  
鍾呂惟少流巖電而擲之

答謝守

某伏蒙台慈念其老朽也而扶之以上藥知其寒苦也  
而被之以純綿思其貧薄也而飫之以甘芬皆非田舍  
家所嘗見也尊上之賜猿鶴為驚再拜以還不盡珍感  
秋崖集卷二十八